

四庫全書

集部

欽定四庫全書

集部

明文海卷四百三十六

詳校官起居注主事臣顧宗泰

主事銜臣徐以坤覆勘

總校官庶吉士臣倉聖脉

校對官中書臣潘奕雋

騰錄監生臣聞 益

欽定四庫全書

明文海卷四百三十六

餘姚黃宗義編

墓文八

文苑

祝先生墓誌銘

陸深

先生諱允明字希哲蘇之長洲人也其先出古太祝以官氏或曰黃帝之後封於祝以國氏云七世祖碧山勝國時由松江來守郡後卒官一子留於蘇遂為蘇人祖

顥正統己未進士終山西布政司右參政父猷母徐氏
大學士武功公女先生少穎敏五歲作徑尺字讀書一
目數行下九歲能詩有奇語既天賦殊特加內外二祖
咸當代魁儒耳濡目染不離典訓稍長遂貫綜羣籍稗
官稗家幽遊蒐瑣之言皆入記覽發為文章崇深鉅麗
橫從開闔茹涵古今無所不有或當廣坐談笑襟運援
毫疾書思若泉湧一時名聲大譟歲壬子舉於鄉故相
王文恪公主試事手其卷不置曰必祝某也既而果得

先生文恪益自喜曰吾不謬知人自是連試禮部不第
當道奇其才會修史將名薦之弗果初仕興寧令地介
嶺海民尚譁訐惑於襍祥先生示之禮簡進秀異授以
經學親為講解遂一變其俗羣盜竄處山谷時出焚斂
為設方畧一旦捕得三十餘輩邑以無警稍遷通判應
天府亡何乞歸又五年卒春秋六十有七夫人李氏鄉
先生太僕少卿應禎之女子男二長續進士入翰林累
遷陝西按察副使次側出幼未名女嫁潮州府經歷王

穀禎先生簡易高曠不樂拘檢在衆若無能者然默而好深湛之思時獨居著書解衣盤礴游心玄間賓客來者叩戶呼之若弗聞也性善書出入魏晉諸家晚益奇縱或購得之輒藏去為榮喜獎掖後進終身不言人過其為家未嘗問有餘得俸祿及四方餉遺輒召所善客與噱飲歌呼費盡乃已或分與持去不遺一錢故其歿也幾無以殮云先生少有意用世既漢落不試一發於文雖聲實閎振猶非其志也所著書合詩文集為數百

卷藏乎家陸粲曰斯文之用與天地準由漢氏來續言之士臻於斯極者亦僅可數已明興百年士猶膠守章句未覩其恢然者也乃憲考之際始彬彬矣祝先生由諸生起覃精發藻橫逸踔厲超追古昔盛哉若其湛浮自得龍變不羈大觀逍遙廓然離俗矣夏侯湛贊東方生云明濟開豁包含弘大拔乎其萃游方之外者殆先生哉先生歿以嘉靖丙戌冬十有二月二十七日又明年戊子冬閏十月十六日葬橫山丹霞塢太原王寵撰

其事行祭為之銘銘曰

惟聖有文自天啓之其卒敝刊孰振起之猗嗟先生發天之明達聖之經播為噌吰舉世震驚維時弗逢食貧以終獨昌其辭以燭羣蒙橫山之原崇四尺者先生之墳後勿壞傷視此名文

天池山人陸子玄墓志銘

陸 梁

天池山人陸子玄者吾弟也名灼更名采世吳人吳之西境有山曰天池蓋道書所稱可以度世者也君意慕

之因自謂山人云君生踔厲英發始為校官弟子不屑
守章句縱學無所不觀從其婦翁故太僕少卿都公游
銳意為古文辭尋以例升太學益務精進視當世顯人
名能文章者輒往踏門自通贄以所業昏一見賞愛其
名遂隱然以起自江以東學士多延頸願交者而君意
獨自許用世謂功業可立取時時於廣座中奮然抵掌
論天下事語多觸時禁客不樂聞稍稍引去或目笑之
君色自如不為止在太學二十年累舉輒躓遭世玩侮

中不能無少望日夜與所善客劇飲歌呼為樂間出游
或經月忘返橐中裝無一錢從者以告若弗聞也東登
秦岱賦游仙三章慨然有輕舉之志南踰閩嶠徘徊武
夷諸山語人曰世無知我者吾聞京師天下豪傑輻輳
又燕趙多慷慨士吾且往觀焉儻庶幾乎行半道病還
及家意頗惘惘夜中數起東西行謂余曰日者言吾歲
行在酉當厄今吾形神不相攝矣吾殆將死也因屏人
屬余後事其言悽愴不忍聞兄弟相對歔歔泣數行下居亡

何竟不起傷哉是歲嘉靖丁酉九月二十二日也年四十一後八年乙巳十二月十三日乃葬其地實天池之麓亦若其冥契云陸於吳為著姓宋季始家陳湖之上吾先君諱應賓母夫人胡氏有三子君最少先取都公女繼取鄒氏子男二長舒枝都出府學生次敬枝側出女一鄒出適太學生陳沛孫男二嘉禾嘉粟君性倜儻不羈與人游處輸寫心腹無所隱匿每揚摧今古品藻人物機辨鋒出莫能窮者而彊執自信不肯屈折徇俗

雖故所親善一弗當意則面斥之或致怨懟不恤也於
文喜稱六代詩初規摹盛唐晚宗謝康樂造語往往似
之居閒弄筆遊戲為近體樂府若調笑率然之作亦醞
藉可喜獨好聞國朝故實所至延訪勤切率多聞人所
未聞者他如幽冥物怪黃冶變化之言靡不采獲著之
編錄點者或謾言以中其意君亦傾聽勿疑聞有奇人
異書不遠數十百里走求之其篤好如此余與君少俱
侍吾伯兄子徵學議論下上自相師友而嗜好畧同方

賴焉以相規切庶有益乎而君棄余死矣銘曰

吳有奇士陸氏子玄生不逢時又弗永年嗚呼悲夫

大石山人壽藏銘

瞿景淳

大石山人者姓顧氏諱元慶蘇之長洲人也顧在吳為著姓入國初有諱仲賢者任淮陽倅三傳至山人曾祖以禮以禮生瓊瓊生巖巖取吳氏繼劉氏生子七山人其仲也始山人祖父性孝友稱為長者有丈夫子八人多以高貲雄里中山人父個儻頗疎於治生然好賓

客集方伎有俠士風山人兄弟多織畝殖產山人獨以
圖書自娛意有所適雖叢說不棄所纂述自養生家以
及諸史燦然雜陳以故竒偉博習之士尤多好之久與
之游山人稱說古今疊疊不窮間遊戲翰墨瀟灑夷曠
得作者遺意故山人雖窮居而隱然名重士林搢紳先
生多折節與交山人故居埭川後徙通安里有山巋然
光照庭戶山人玩而樂之時與同志嘯咏其間因規大
石塢為壽藏表以貞松曰人生行樂耳即有不諱吾將

葬焉因自號為大石山人且以生誌屬余云余少習知
山人文雅甚都竊怪其與眾異趨疑其有阮嗣宗之放
達也邇歲山人執父喪余往弔之山人貌甚毀瘠杖乃
僅起心益重之既余登山四望窮勾吳之墟慨然歎曰
嗟乎此泰伯之所以從道也夫古人意有不存即視天
下猶敝屣况下焉者乎既而徘徊夷猶南望震澤東望
胥口傷子胥之不終至為流涕思欲起范蠡而挹其緒
風乃知山人之意遠矣今山人不以後事為諱而屬余

以誌銘蓋將齊生死等彭殤超然與元化共游窮達之際又惡足為山人言哉山人配王氏誥封詹事府翰林院侍讀學士王公朝用之女子男四人曰誥曰諫曰議曰諤各事耕讀不愧山人云銘曰

雲觸石兮山冥冥龍翕忽兮雨下零忽雲收兮雨止獨山石兮青瑩豈動者不處兮而靜者永寧吟山風兮玩山月固將永托乎山靈

南京國子監祭酒槐野王公行狀

瞿景淳

嗚呼槐野王公之卒三年矣淳每念疇昔瞻望西岳輒
歎歎不能止思欲一拜几前無從也今年丁巳春公母
太孺人將圖葬公乃馳一介走京師乞銘於當世名公
且屬某編次行事顧某誠固陋不足以知公然公從弟
維新所述甚核而文參諸吏部司勳南君所覩記宜得
其大都謹拜述如太孺人教公姓王氏諱維禎字允寧
別號槐野陝西華州人也其先昌平州人始祖諱伯牙
者由進士任河南憲副左遷華州稅課局大使因家焉

伯牙生處士得得生真定縣令徽處士和和生子六人
處士原其行五也原生子二人長曰載號文菴次曰軒
號質菴文菴公配劉氏以正德丁卯十一月二日生公
王氏之家華州者至公凡六世矣世以文行相後先故
遂為關中望族云公生而風骨峻岐文菴公督令就學
甫十歲即善舉子業復多博習古文辭為文疏宕爽朗
經師異之曰大王門者必此子也文菴公亦喜甚甫弱
冠督學漁石唐公鳳泉王公咸以國士期之歲辛卯舉

於鄉越乙未舉進士選授翰林院庶吉士讀書中秘三
閏年乃授檢討自同館咸推讓公才後文菴以公貴蒙
恩贈徵仕郎翰林院檢討母劉氏封為太孺人云公傷
文菴公早世祿養不逮太孺人復以久客京邸思歸丁
酉冬充冊使副便道奉太孺人西歸而祭文菴公墓焚
黃寫哀太孺人有女許字東生夔夔故仕族家稍削公
特厚其資嫁之仍歲時餽遺不絕以順適母意又明年
己亥公留內子東孺人侍太孺人居單車復命再閱

時會東孺人卒公感泣且念母獨居無侍故肺疾寢劇具疏以請得賜歸侍養越辛丑復奉太孺人如京師甲辰會試為同考官取士號多得人乙巳冬太孺人念其女忽忽不樂時公與纂修會典重違母意復疏請得奉太孺人歸以丁未春還史館繹舊業逮己酉以九載考績乃晉秩為修撰方公以盛年登朝而積勞取貴可歲月計然公欲娛太孺人每遲回家居公誠賢者知所重固不以彼易此也庚戌會試復為同考官公發策詢士

畧曰今大同邊垣既以底績而薊州一路顧有遺謀自今作之西接宣府東抵山海為邊千二百里使幹濟之臣戮力經營患可少止是年秋敵果自薊州入天子採羣臣議特設總督大臣一人使專備遼薊其議蓋自公發之冬十月會試武舉公為主考官仰天祝曰是安得徇國之人而收之以裨國用臨卷品士必先謀識所進武弁亦多得人公燕居好觀古今名臣經畧凡闕隘阨塞備禦疏密之詳皆能歷歷指陳不俟按圖其用世意

氣立談可知也辛亥冬詔晉秩為右春坊右諭德署南
京翰林院事公念南京王業根本控江海上游宜早戒
不虞每措紳過從輒訊兵馬錢穀之事人或以為迂無
何會倭奴寇下江諸郡始服公先識時洛陽孫公以工
部尚書攝兵部事公馳就議事即日協同內外守備振
揚兵威固守要害寇知有備遂遁去公謀居多甲寅夏
有詔召還宮坊時太孺人留闕中便道歸省且疏請終
養天子不可吏部移文促公還任惶懼就道既入見復

申前疏留中不報乙卯秋命主順天府鄉試士類忻忻
多自幸入公彀中公凡四入試場每錄出土爭傳觀謂
真班馬之匹云時公方嚮用會太孺人遘末疾公聞報
驚仆失聲悲號寢食俱廢復披瀝請終養久之乃晉秩
為南京國子監祭酒謝恩畢即日陞辭倍道西馳不數
日過西岳為文虔禱請以身代母太孺人聞公至病亦
少愈是年冬關中地大震山摧川溢城郭廬舍多傾毀
民人壓死者過半而公亦不免實嘉靖乙卯冬十二月十

三日悲夫悲夫傳稱天道無親惟與善人若公之念母好爵不靡非所謂善人耶而卒罹此曩所稱天道信耶否耶豈天地閉塞賢哲將隱公固不能獨違也公性孝友始為諸生時喪文菴公哀毀骨立比既貴每在告事仲父質菴恭順唯諾如事文菴公與從兄弟維祺維新維厚羣居怡怡友恭藹然人不知為從兄弟也從姪吉兆少孤貧公異其質資給就學撫而教之甚備今為郡學生念族蕃有貧不能喪葬者割地立塋俾以昭穆次

第卽葬其中歲饑則出粟以贍族有婚喪亦如之故族人多德公云公素剛直少不當意卽時貴必面斥其過人或不堪然與人交不渝終始誠意懇至迥出俗輩里中孫通判某居官清苦夫婦歿垂三十年其子不能葬公為買地葬之其與人之周多類此故雖素不悅公者亦服公高義公雅意經世然優游館閣積二十餘年訖不當任故不及以功業自見時托之著述今有稿三十餘卷達人君子取而玩焉亦可以識其微意之存也公

先配東氏兵部車駕司郎中東君魯之女生男二曰逢
春長春俱不育繼配安陽丞郭君從禮之女生女二長
許舉人東君斐子某歿於室次許今吏部稽勳司主事
南君軒季子學嗣側室宋氏生男一曰京闈復聘東君
斐女尋舊好也太孺人卜以某年月日葬公少華山麓
祖塋之次於戲公為關中偉人咸期以公輔然歷官僅
四轉享年僅四十有九何去之忽也然公文章節概傳
千百年猶當赫赫在人則公雖死猶生矣淳本海濱鄙

生甲辰之春荷公首薦入史館從公後每辱訓迪愧淺
中弱植不克副今公已矣豈名山之類括人之萎數固
相符如古所歎乎敢忘固陋取公遺事論次如右惟大
人先生擇而賜之銘公雖不幸亦可瞑目矣夫

中憲大夫翰林院提督四譯館太常寺少卿李公

墓誌銘 殷士儋

嘉靖初文治恬熙羣良彙進於時仕於中朝者有八才
子稱中麓李公其一也公以隆慶二年二月望日卒於

家嗣子幼弱里中無賴稍稍齟齬之而一二有司復持之急以故不克襄事者數年至是始議以壬申某月日葬公綠原村祖塋前期嗣子持狀來請銘余曰公吾邦之良也矧頗悉其行事銘惡可辭按狀公名開先字伯華中麓其別號也先本伯陽之裔居隴西者最著其後始自隴西徙長城嶺又自長城嶺徙綠原村於是遂為章邱人數傳有名子瞻者公曾大父也子瞻生聰皆邑諸生聰生淳正德庚午舉於鄉取於王而生公以公貴

累贈奉直大夫吏部驗封員外郎王累封太宜人公以
毛詩舉嘉靖戊子山東鄉試第二人明年成進士授戶
部雲南司主事久之調吏部考功歷稽勲驗封員外郎
郎中己又改司文選尋擢太常寺少卿提督四譯館居
無何罷歸蓋家居者二十年而卒公生而卓犖穎異七
歲善屬文讀書一見輒成誦而又即知聲律吟咏之學
稍長補博士弟子員里中有繇役苦公公自言於令令
面試大奇之為復其家於是齊魯章縫之士咸嘖嘖推

穀李生矣未幾贈公捐館舍公哀毀盡禮已又喪其祖母某公持服如贈公鄉人稱之服除遂連舉進士嘗運餉金詣寧夏當是時關中有兩太史康公海王公九思家在武功鄠杜之間公業聞兩公名及使還過訪之此兩公者俱以才自雄睥睨一世乃見公獨懼然相得為留數日始別復移書唐太宰薦之抵家以疾在告者踰年始授戶部主事戶部為金穀劇曹而公所督太倉粟時尚有中貴人監之公不競不紉委曲調停無撓法焉

復奉命出理徐州倉頃之以望調吏部為太宰汪公鉉所器重故任吏部者率矜崖岸高自標致扃門謝賓客雖親故人不相接以示尊倨公顧數與諸交游以詩文相賡和暇則浮白對奕談笑竟日而無廢事卒之人莫敢干以私而稱吏部能謝絕請謁亦卒無踰公者公既負才氣居銓衡要路素抗直不善事權貴人而諸僥倖見抑者又日媒孽之時柄臣銜公不附已遣邏卒廉公陰事久之無所得終不釋公至是蓋已遷太常矣會九

廟災公例上疏自陳竟中以他事令公歸歸時年才四
十耳居六歲而配張宜人又卒六歲而太宜人卒公哀
毀彌甚每哭輒撫棺號曰天乎乃不令母見開先舉子
耶蓋遲遲者越八年始葬焉公故嘗病脾間歲作不至
劇丁卯秋乃大作踰年竟不起距生於弘治壬戌八月
二十八日凡六十有八歲配張氏即先公卒者繼王氏
齊東人咸有懿行可稱述嗣子名春塢娶康氏太守廸
吉女公少博學彊記有大志所與交皆當世知名士以

意氣相許遇事籌畫剖析多出人意表往先皇帝幸承
天嘗命少傅翟公巡九邊云翟公議自遼東始業已行
矣公獨請問謂曰公國家重臣也主上所倚任京師密
適當路塞藩籬單弱敵颺迅可至今車駕在江漢公奈
何復去京師令緩急不相及乎公徃宜自宣大此聲實
相副萬全之畫也翟公瞿然悔失計拊手謝曰老諍不
任事微君幸教幾失之卒改行如公策公之慷慨知大
計皆此類也於戲以彼其才假令秉筦鑰之寄所建豎

必且掀揭可觀乃於方壯之年竟一蹶不復起雖致位
卿貳稍稱通顯矣然實未究厥施也昔人論馮唐李廣
有不逢時之歎乃先皇帝長馭遠攬臣下一言稱旨即
不次待以卿相可謂有時而公卒擯棄不偶以死此又
何說也比先皇帝上賓公聞之躡踊幾絕意若無復有
知己者公之情見矣公自罷歸稍益充拓舊學與荆川
唐公念菴羅公約為天台雁蕩之遊值喪其內子不果
行既而歎曰會心處不必在遠吾直巖居而川觀耳乃

關亭館招致四方賓客時時以其抑鬱不平之狀發之於詩尤好為金元樂府不經思索頃刻千餘言酒酣與諸賓客倚歌相和怡然樂也以是公之長篇短調幾徧海內而名亦隨之人或以靡曼謂公者公不顧於戲古賢智之士抱琬琰而就煨塵者或傍山而吟或披髮而嘯或鹿裘帶索而歌要之其中皆有所負而未庸故緣此以自洩而世以恆度測之遠矣若公者毋亦有所負而欲洩也歟良可悲矣所著有閒居集十二卷襟集二

十一種行於世系之以銘曰

繡江之濱章邱是營誕此哲人維公以生譬彼韞玉為
圭為璜僉曰良哉天衢而亨胡然中塌挂冠遺榮繡江
清漪可以濯纓以觴以咏以怡我情千里伏櫪向風則
鳴天地一喙泰山為輕古亦有言人貌榮名彼巧宦者
四至九卿公豈不達適駿有聲鬱鬱芊芊美矣佳城闕
彼無疆視此勒銘

黃先生墓誌銘

皇甫沔

夫神駿伏櫪而駑駘驟乘蛾眉棄捐而勃屑進御瑜瑾
韞匱而瓴甌騰價龍劔敝室而鉛刀發硎士亦有然者
天乎人邪求士若此望世又安得乎吳人於是乎搯拏
為黃生矣按狀黃君諱魯曾字得之人稱為中南先生
云其先河南汝寧人也宋元兵興間高安公徙家袁州
生斌少習孫吳書學擊劔騎射察觀英雄屬馬值徐壽
輝破袁州以斌為萬戶尋自偽漢亡歸高皇帝從徇南
昌授昭信校尉調禦蘇州遂家於吳君六世祖也生信

信生景暉為武略將軍景暉生暉始棄武攻文以進士起家任比部郎決獄三輔以為神明生異號葵菴公君其仲子也生而穎慧過人葵菴善操其息立致萬金產析子各千餘君與弟省曾即五岳山人也盡以購書讀之父為譙讓對曰昔人謂黃金滿籬不如一經矧五車乎與其饒於貲孰若饒於學乎比部公聞而賢之弱冠並充弟子員竊鄙時義博綜羣籍探古文辭好奇縱譎為文闕衍莫能加焉長則方面巨耳修髯炯目昂軀山

立偉然丈夫也丙子試南畿主司為李公廷相覽其卷
深加歎賞置易第一錄其論以獻不竄一字俾為後學
式云屢上春官不第同年崔公桐時為少宗伯諷曰子
日暮矣時不可失禮曹司務員缺姑屈劾一官可乎君
笑而拒之出曰咄嗟崔生安知余之心哉方今專重進
士即才如董賈學擅班揚位躋鄉貳勳垂竹帛問之非
由進士終報顏憾心矣是時抱志不屑謁選者余長公
仲海鹽王生文祿耳嚴相聞之亦願見此三人三人不

肯行天下想聞其風焉蔡菴晚年任俠務博有大度苟
不得盧千金捐於一擲無恨也以故家易凋落又廣置
妾媵多生庶子卒無長物君事母王太孺人竭盡孝養
讓其先人之廬以與諸弟而身自僦居委巷晏如也長
兄太學生孝曾早卒撫幼妹長為治裝嫁之錢生用商
示以時義獲舉於鄉今為肥鄉令是也性狷介忤俗離
羣寡所交遊弟省曾外惟王守王寵耳余兄弟以中表
尤密八子齊名吳趨為之語曰黃家二龍王氏雙壁皇

甫四傑鳳毛鸞翼同學莫敢仰視矣包山徐鱗以藝文
始終稱莫逆焉後遇太學張獻翼即投分歎曰恨得子
之晚也兼以峻直不能容物邑令張舜元苛法於其僕
斃於杖下君為發喪令蒲伏引慝里兒以催科逞侮君
上書李節推士允略曰一介不取僕之志也倚馬萬言
僕之才也李覽之為歛容卒當侮者罪居父喪郡守胡
公纘宗唁其廬就幕次稽顙曰衰經不敢詣公庭以謝
守辭而避之其梗概皆此類亦以見當時守令賢於今

遠矣已未之春年餘七十猶擔簦躡屨自潞河徒步入京師其篤如此所著多憤世刺時之篇若令語士役議枕戈謀言序使服官政必多忠猷毅烈乃竟已矣聞居弗豫時過其姪姬水城南精舍茂林修竹觴咏移日姬水者五岳子也嘗奉安石以遊承阿咸之賞者也是歲業將北上趨治裝把臂謂曰人各有志余豈智不逮而父耶蓋五岳由辛卯舉於鄉亦置詩第一壬辰走京師觀樂而返後不更往世盡高之亡何君平方其彌留猶

不忘一第悲哉是為嘉靖辛酉六月晦生當弘治丁未
三月朔享年七十有五云娶徐氏都御史徐公源之孫
繼蔣氏側室趙氏男三長道美郡學生先卒次道貴次
河水俱郡學生孫男三道貴生嘉瑞郡學生嘉德河水
生嘉穀尚幼道貴等卜隆慶某年月日奉公柩厝於靈
巖西麓之新阡踰十年所而後克葬傷哉貧也狀即姬
水手勒粲然華矣然詳於論文而畧於紀事余稍增益
所聞至云文喜左氏莊騷太史得其曠婉詩喜曹謝岑

李黃孟得其健逸皆實錄也余復何贅焉而妄人詆其
不嫻於藝荷哉白首牖下誦覽不輟鉛槧日操多所校
輯若孔氏家語兩漢博聞漢唐晉四傳唐詩二選仙家
四書大吟小吟錄詩說諸集行於世及隱居北遊閒居
客中諸集散逸頗多蓋襄陽綴不逮意茂陵稿輒屬人
也河水挺濟美之才負紹述之志旁搜博采題曰天中
集徐君序而傳之所謂愛奇凌誕率任天衷蘊藻沈思
獨持氣骨要亦知己之言哉二孤請銘銘曰

矯矯黃君希世奇寶鸞鷲匪羣竽瑟違好莫為之先蟠
木登廟伊誰之愆荆璧委耀原君屢貧孔行卒老夸死
馮生均湮腐草氣吐虹霓塞於蒼昊卜宅靈巖別開京
兆辭乏中郎曷彰有道往矣餘名來斯允詔

明吏部文選清吏司員外郎王君墓表

皇甫沔

吏部文選員外郎王君卒其門生陸尚寶師道狀其行
友人王參議庭為之銘足以闡懿生平垂休來葉矣諸
孤謂余與君乙酉同舉於鄉己丑同升於朝交最篤而

知更深也請表其顯且大者聊補誌狀所未備云君諱穀祥字祿之惟辛酉君以降而上世嘗誦酉室者適符其生因題其居而自稱酉室云系出太原晉末徙閩之福清唐水部祭為世譜載其先大雅慎微皆起進士傳至八世祖仲舉贈奉議郎始遷吳之長洲生蘋仕宋為著作郎終中大夫生敏精於醫生觀能世其業即君之父也子孫守其方書徃徃全活人吳中稱醫家者流必首王氏云君生而器雅童烏之齡即能屬文樂安之歲

選充縣學弟子員文恪王公一見奇之曰吾宗千里駒
殆此子矣時文待詔蔡孔目尚在諸生中引為忘年交
二王諸素以才齊名既舉進士改翰林院庶吉士先帝
疑政府私樹桃李詔悉罷之乃授工部屯田司主事少
宰徐文敏公乙酉座主也薦調考功尋署文選員外遇
正郎缺期月不拜謂君明慎銓藻咸當其人力足攝也
時太宰為婺源汪公鉉專司政府賢不肖一切倒置選
法幾壞君每與忤將中傷君君稍覺乃以母老不便北

土乞歸侍養而忘其有兄不得輒引是例命下予告仍
勅按院覈之遂出貶真定尉棄不拜兄穀禎尚官嶺南
郡幕先有傳其物故者妄也嗟乎為母承謹無忝人子
矣時鄜子汴王子慎中任子瀚唐子順之並以才居吏
部不利為伍君行而諸子亦相繼謝去鄒陽入朝見嫉
之言固不驗邪後周恭肅公故吏部少宰也再召入京
謂汪曰公不足王子者奚故汪曰本部左遷非止一人
彼獨薄尉者非矯邪周笑曰公謬矣員外初以母不便

於北土真定去京師纔數百里獨能安邪既以母老乞
歸今可捨之而身自之官邪是猶欲其出而閉之門也
江浙間寧無散郡可迎養者乎公領之意終不釋而君
亦矢心不復仕矣亡何太安人背養居喪敦禮以父事
兄以母奉寡姊友睦蓋天性也杜門却掃委懷圖史絕
戀紛華既無塵網之嬰亦無山水之好有田在東郭外
課農自給殷春閱耕迨冬納稼間一往與田父老談笑
移日不知為吏部郎也胡安人亦時往饁之君曰昔介

子與母偕隱龐公將婦以遊向恨失之綿上今幸得之
鹿門矣撫按諸司交相推薦疏累上未報厥後太宰為
甌寧李公默己丑房考也素重君諷御史特疏舉君又
移書所司為趣駕終不赴時倭夷構亂兵火戒嚴人皆
以墳墓妻子為念奚暇計爵位哉安人痛姑之亡鬱鬱
喪明君素不畜妾媵躬視家事雖洒削脩脯酒醬之瑣
悉理周密或以此少之而君恬不恤也君既不出而李
公竟坐讒死世益賢君矣今上嗣位簡用先帝舊臣君

業已補尉大名至是超拜南京文選主事地近而易即
僉謂由此可立致崇顯而君稱疾堅不就衆為惜之而
陸君由南儀曹起僅遷尚寶君殆有見也郡守永年蔡
公甫下車首書清德表其里枉駕造其廬坐牀第間相
勞苦君口不能語咄咄書空稽首作謝狀里中嗟歎謂
賢哉蔡侯也隆慶改元丁卯春二月十二日安人胡氏
卒君震悼幾殞五內俱傷又力疾為治喪事病遂劇非
藥石刀圭可緩息也越明年戊辰九月九日卒七十稀

年未躋二稔耳悲哉先是文待詔方負重名吳人士多
因之起譽君尤所親愛其所否者余安定與黃江夏耳
君為詩沖澹而不尚綺靡文亦典雅有則書倣晉人不
墜右軍大令之風寄興丹青追工摩詰之技篆籀八體
並臻妙品晚抱書癖手自鈔錄無間寒暑讐校魯豕累
無脫誤雖大亮之百卷繕寫子孺之三篋刊亡曷過焉
今張燕公陸放翁曾南豐三集南唐書野客叢書手澤
猶存所纂郡學誌并著詩文若干卷行於世君性整潔

不為苟簡室中器物置必有恆所衣服巾履雖敝無點
膩可澣足跡未嘗入公府有以事干請者挹其風概不
復敢言客有詆人短者以他語亂之慙色而去自唐宋
以降數百年遺像封誥璽書之類必加寶護此外無長
物也子男三長仲友國子生次仲恭郡學生季仲序孫
男四婚娶皆名族詳具誌中茲不載君亦可以不死矣
是歲十二月二十八日卜吉祖塋旁仲友等奉二棺合
葬云司勳氏曰若王貞外者表署於鄭鄉稽評於月旦

勒有道之碑展季子之墓易名斷謚其在陶趙間乎夫
嗇君者年完君者天夷清而聖臧節而賢嗚呼先生之
清節足以起懦激廉矣靈巖之境橫山之巔爰起新阡
灼灼桃隴夫人從焉奮猷樹烈後其考旃

明中奉大夫廣西右布政使許公墓誌銘

侯一元

嘉靖乙丑茗山先生許公以廣西右使覲還道家屬疾
其秋七月遂卒嗚呼鉅人歿矣我明述作於是焉寄并
冽鼎膏亦既云食忽而冪焉弗及玉鉉命也夫搜獵墳

典淳滴自出而弗獲典司綸綍著之鼎石明練政理惠
亭人屯而弗獲身都将相繫奠社稷馮翼孝德棊恭允
塞而弗獲正容造膝培輔袞職公雖該三不朽聲施無
窮與天壤終哉而知公者猶以密雲不施吾道窮也悲
夫始余甫與計偕公為都官從塵坱中獨騎訪余城南
邸舍引與為友余素慕公高其龍門迎謁則大驚不識
所自聞也已乃知公友蔡公子木言余而公忘已好士
所饑渴類如此徧於海內矣去五歲則公之弟叔夏來

同官一見相說其游昆弟不如也而余弟一麟亦自以其所文贅謁公公又弟蓄之因相為通家中間蹤跡或離或合往十二歲則叔夏歿哭之及是而遂哭公焉悲可言哉公卒之明年其孤長豫將以十二月寔公某山之陽而謀父友敬亭陳公以狀來請銘嗟乎余何足以知公亦幸有陳公之言爾誌曰公諱應元字子春其先順天東安人高祖誠舉鄉進士謫宦為蘭溪典史道錢塘家焉遂為錢塘人誠生九臯九臯生紳紳生龜年號

平厓則公之父也力學負畸行為博士弟子試輒不第
因棄去而有二子長為公次即叔夏應亨異材駢出於
是以公貴贈父奉訓大夫工部都水員外而母陳封太
宜人蓋許氏之遷僅五世而隱然錢塘名家云公生而
絕敏數歲即日誦數百言平厓公受易稱深博而公年
十五則盡通其家學嗣為博士弟子二十而舉嘉靖乙
酉鄉試嗜古學名大起己丑之試太史倫公以訓奇其
文欲高列之不能得至壬辰而舉進士復得倫公品之

曰西京之文也當選庶吉士執政者欲一見公不往曰
吾始仕也而當偃僂鼎貴之門冒詢干進哉竟坐是出
為泰安州知州至則闢泰山書院簡士濯磨教之文風
大振有豪右觸法賂權貴人以請公不為撓廉白自守
減節民力嘗有史僉事者以供饋薄梓察吏欲笞之公
從容進曰知州罪也請貸察吏僉事不顧公出即投劾
自免於是撫按交慰留公而僉事亦內愧去無何以能
理劇復調泰州泰人有張御史者陰鷙常狙伺持吏短

長橫行州中公至與直繩既伺無所得即攝伏不敢翫
法居一年以父憂歸服竟擢工部都水員外郎是時江
西夏相國者幸於上詔工部遣官作治其父墓而夏欲
得名士即推公往非其志也然職事不得辭使往且二
年益持廉正非公事不交相君相君心敬之欲轉公太
僕少卿公聞堅辭又欲使江西提學又辭其轉為虞衡
郎中也董鑄錢治盜甲日與中貴人從事而公端凝自
持未嘗與交私語中貴人亦莫不敬公者為郎六載乃

遷夔州府知府夔孔道交番漢襟兵民號難治公馴以
靖庶馭以平典時斥其桀黠者法之郡以蘇息日勸學
敦士暇則求三閭大夫杜工部故跡為祠祀之弔古嘯
咏篇什流傳以儒飾吏彬彬如也而夔之治遂為一道
最又六載擢四川按察副使甫上而值新執政不悅於
故相則以公前使事嗾言者彈公御史大夫屠公僑者
剛正人也抗言曰夫許子為郎久之乃出為遠郡又久
之乃遷即不考其行能也且若此者而猶為干進耶於

是素履愈白然猶調為廣西副使兼撫夷夷侵蝕郡縣
為上三議曰責田主嚴罰格更旗軍大畧主守監護田
者扼夷奪之食積牙牯童使自屈而已事皆施用攝兵
府江誅巨獐三焉巨獐者莫氏兄弟三人以雄勇名兩
粵間徃嘗破城殺吏討之漏乃去前兵備以獲報而罷
兵及是復出公愆前事設方略購土人決辰而三光授
首督撫將上其功公念前兵備且得罪迺力阻不復上
有獄當遠戍而人衆公第謫其一二餘悉未減曰法如

是足矣且戍者皆當發閭左護其行本以懲奸也而甚
病民不可凡公之弘厚類是也遷遼東苑馬寺卿條牧
政八事轉雲南布政司參政未上而奔太宜人喪已
未迺起補福建時倭夷整居縱掠公至則慷慨薦食厲
兵以寡擊衆遂大破賊衆多首功而公終守正不自言
也公去閩半歲間則後守者隳敗賊遂入興化塗地矣
壬戌為雲南按察使明年徙今官所在有績廣西父老
迎公蓋欣欣喜而泣也然公再歷瘴鄉憂民惕夷貌亦

侵尋為之啟矣余嘗以戒公甲子同覲京師數相問無
恙明年余先至江右除道遲公怪其久不至豈謂長逝
哉公之生正德丙寅正月二十八日得年僅六十甲子
適週也悲夫蓋許氏世仁平厓尤好施公嘗先意承志
父歿事仲父如父事姑如母婚嫁其從父昆弟又旁及
其母氏之舅若女弟鍾公鄭媪凡寡貧者皆以公為歸
其教弟石屋君叔夏也甚愛而嚴石屋君天穎舉世無
與讓余嘗與品文至公則動容變色歛然自謂不才弟

也蓋伯氏而若嚴君云石屋君失偶遺其女公則使室人撫之已又厚嫁之視之如已出馬雅念水木每道東安省封樹過存其宗人又攜其子弟至錢塘教之成業乃去其交友不妄若翁長卿相邵良用梗包子木梧子同桐張伯生乾元陸良弼佑或出或處而皆同心斷金焉伯生先卒事具公所為誌良弼貧也公則自滇萬里寄白金二錠資之其他醇德甚備而推本皆自平厓公所著有水部稿倚堂稿春秋內傳列國語史記鈔漢語

合若干卷世嘗言文士斲行而椎魯者亦少文乃讀公所著書雄深雅贍遷固無以加也卓識通猷則肩於董賈其叙義烈苦言至意讀之常使人涕焉以彼質行而文廼若此非所謂弼中彪外者邪敬亭公稱公曰文行具美亶然哉亶然哉或曰許公行仁厚天所佑恂恂不以其能先人宜有所助而仕顧久不進亦不大壽何也蓋公文詞絕世而不肯為貴勢役自前後相國鱗萃天下之士雅誦洋洋而求之卒亡有也亦知公矣彼豈能無

心慍哉至言天之故則其所甚美而靳秘者尤莫如文
詞故李杜軾軻勃賀則歿齒角翼足之理然也馴斯以
觀公位岳伯而年下壽其亦天之善貸也已悲夫公一
娶徐氏贈宜人子曰長豫郡學生才行肖公者也再娶
包氏封宜人子曰次紆三娶張氏子曰少仔其媵子曰
季序孫男蜀客郡學生楚材晉卿孫女長字林鳳翔次
何汝孝俱邑學生次幼曾孫女一振振乎仁者之後蓋
未艾也銘曰

被爾雲裳佩爾玉璜玄黃柔剛以行四方有來煌煌朱
虎以降青牛逝矣紫雲其藏有斧有堂為嶽為光言旋
言歸於帝之傍

中憲大夫重慶府知府嵩陽劉公暨配胡孺人墓

誌銘

張佳胤

某弱冠稱諸生時劉先生守重慶校一郡士拔置高等
至引與二子黃裳黃鼎游蓋驩然師弟子也先生歿五
年而黃裳手狀徵余銘嗟夫狀所列盡矣而余安忍銘

然余視先生猶父也又何能辭按狀先生諱繪字汝素
一字少質其先陶唐氏有劉累擾龍於夏代著融顯國
初隸籍錦衣衛其徙汝光州自七世祖始曾祖忠贈太
僕丞祖進太僕丞以子方伯公貴贈少卿以孝旌閭生
六子季曰廷佩為先生父倣儻喜大節好施予娶鍾夫
人生先生先生八歲師受伯兄經毛詩通大義稍長讀
史記汲鄭傳慕其為人為文倣史氏伯兄見而驚曰必
弟也興劉氏者年十六補郡弟子員郡倅張君奇先生

材為具禮室胡孺人先生長哲電目高準修髯喜讀左
國縱橫家言擊劔通俠以自豪嘉靖辛卯領省解入京
而滄陽王生引少年數十輩逆先生邯鄲校獵山下置
酒亢歌振木燕趙慷慨之士聞之咸為感奮比至京都
御史儀封王公語人曰今歲計偕士若蘇清左國瓌與
劉生可謂中原三豪矣乙未成進士肆政戶部嘗晏至
大司徒梁公據案讓之先生為賦孤鶴上書求去梁公
更相推重而是時濟南李開先武進唐順之平涼趙時

春名傾一時乃無不下先生者以母鍾夫人病告歸歸
二年出投行人使韓事竣道出武功時康修撰海家居
逢先生縣界歎曰子非汝南劉髯耶執手驩甚為置酒
鞠域中康自起撥琵琶先生撾鼓三摻作漁陽聲宮羽
轉激四座盡傾明年選給事戶科首上治河疏陳四事
上可其奏九廟災上封事具襍祥洪範五行休咎勸上
居法宮無勞神是時貴溪相用事深忌先生益氣奮再
伏闕上書為樞言者一正言者二愚言者三在攬權馭

大臣令中官毋得制兵而益開言路上為動容俺答數
入雲中詔舉邊材可當之者而言官某阿相公私所舉
不稱旨先生廷劾言官非是上乃讓二相謫言官罷不
稱旨者初貴溪相與侯勛陰害而陽浮好謀共傾司馬
王公公遂劾勛姦賊竟下獄而夏緣是欲中王并罪之
先生為上書理其寃明日罷王歸夏恚甚然無可誰何
先生者乃遣客李寶以姑布之術說先生附已當大顯
先生怒髮豎捽胡投寶柱下明日捐夏於朝曰某且死

職不能從客言他日從諸給舍壽相公相公手玉碗行酒至先生前誦麗詞為歡公色勃勃故墮碗客盡驚出明日疏夏十罪謂夏顓權驕恣無人臣禮當坐死疏寢不報是歲壬寅六月朔晝晦上大恐問天官主何占公復上封事曰臣謹按漢書劉向京房郎顓皆謂陰掩陽為臣迫君之象沴氣下盛上著於天宜亟去言以塞天意明日遂逐夏一時臺省出夏門者悉被黜因上邊事疏舉聶豹王儀可大用而劾二撫臣異與語侵銓部吉

水毛公伯溫讀疏吐舌曰真夫哉每過先生必論兵陳
車法先生曰此故器書不可以兵夫敵血飲而蹶張烏
舉而獸伏飄若風雨非得神勇士卷甲銜枚絕塞斫營
則燕然未易勒也毛公歎服是冬復草疏欲及內事母
鍾為絕漿相向泣先生乃已因求使楚中奉母鍾歸明
年癸卯改右給事刑科未幾出守重慶蓋銓部報往疏
也重慶在萬山中稱巖郡先生攜二子扁舟過黃陵廟
祝曰此神禹駕黃龍犁峽所也梁豫去數千里吾以二

子來而以墨反有如此江至即貌野老幅巾延問便苦
獻歲行春必載牛酒勞農因止宿田家召其子弟教歌
咏彈琴馬夜市火先生拜之滅夏旱身雩於社雨隨注
至沒先生之腹父老泣扶乃起是年大豐渝俗士人上
已咸汎江游塗山先生亦間往諸父老具壺簞迎先生
少飲輒醉醉歌起萬人和融融洩洩至今想光景不衰
渝多奇士先生聚若干人使讀書塗山上丙午蜀試士
半出其中民有兄弟訟田者先生為對泣曰豈吾不忍

其兄而使民乃恐其弟哉民皆叩頭流血相讓田去凡受爰書必平之法寧失無苛郡以大治郡地通西南夷而播永土官數爭地相讐戮直在播臺使者屬先生按其事先生單車入赤水永女酋魁結祚馬陣諸山譟兵澤中嘗先生賄弗為動諭以大義永不勒兵播地遂歸渝江官舸費萬計而大司空采木亦不下百萬計先生恚上竒羨不以私屬守令皆莊事先生無敢睨視使者剡薦於朝為循吏第一而值貴溪起相嗾鄉人給事南

省者論罷先生先生讀疏笑曰嘗予之彈絃而踏踟殆
知予者予乃今從榮生帶索游矣然豈以重慶易吾養
也乃度北瀦濕於園之幾十里名玄湖湖種魚十萬頭
隄樹萬章盡有蕪葭菱芡菰藕之利洲上牧牛羊雞豕
聚廬其中如農家又責僮以鹽菜乘馬數以歲賦布易
鹽構通馬者鬻善馬他郡而實之邊因資以贏而身與
數友馳快馬射獵熊山下得禽以奉太夫人歡自撰歌
曲為綵衣銀鐙之舞以侑太夫人太夫人忘老為加餐

其穀入厓厓先公之遺而親族貧士資以舉婚喪者半
又稍通墨客無他贏已太夫人歿而黃裳黃鼎舉於鄉
乃盡散山中諸少年結草閣湖中集徒數十人講經義
撰易勺四卷春秋管十二卷作通論四十篇著詩賦序
記禠文二十卷學者尊為嵩陽先生而不敢氏安陽郭
相嘗謂新鄭高相曰劉汝南富於著作必傳矣先生之
卒於隱仲子黃鼎方會試癸酉預知死日言白雞之年
吾逝哉逝二年所而胡孺人亦卒孺人性甚慧年甫七

歲誦春秋孝經父西泉公授以衛夫人書下筆精詣西
泉公甚材孺人而擇偶者無如先生遂歸劉姑鍾性嚴一
鬻非孺人操鼎即不食雖祈寒盛暑孺人未嘗少懈也
先生給事省中每疏上人人危孺人前慰姑曰給諫死
忠新婦亦能死孝姑何憂自省中出守至以讒罷孺人
未嘗少感也其力儉不奢自其天性然其撫二媵若娣
如字其子女若已出蓋所謂婉賢儷行哉先生生弘治
乙丑卒於萬曆癸酉四月二十五日得壽六十有九孺

人生正德丙寅卒於萬曆乙亥十二月二日得壽七十
子三黃裳娶崔氏舉乙卯鄉試黃鼎娶汪氏再娶成氏
舉甲子鄉試黃駿騰王出娶陳員外璋女女一媵謝出
適璋子九鼎孫三衍衍衢衍聘鄉進士賈一敬女衍聘
胡御史俊德女女孫三適喻芳華聘賈之約羅璿張子
曰嘉靖間夏相貴勢熏灼天下幾侔人主矣先生以夕
郎言事至令其喘不出聲捋虎鬚幾不免虎口巖哉乃
其出守罷守始終無少點流澤迄於今未闕其非純氣

是用可知已顧材雄不能受貧取譽於俗夫筭既已不用之國而用之家即賜蠹何傷於賢乎至晚節益茂於經術其所取精也多矣又記乙亥冬某起家南鄉迂道走光黃起居孺人至則孺人先一月卒某為文哭已躍馬南山下作輓章展先生墓為之欷歔失聲信宿長公子立廬所然後去嗚呼先生位不酬才與孺人教諸子伯仲並舉於鄉以文章鳴世乃仲公賣志蚤卒何哉先生之留餘以究厥施者是在子玄以及諸子孫矣某往

與汝寧趙良弼太宰私論先生父子氣節文章類眉山而孺人則又類程太君良弼謂其知言也為之銘曰造化福取不足曰惟先生之畜操婦則立壺極曰惟孺人之德嗚呼天中之野淮康之泚玄室千秋二靈安是施其本支振濟美其誰者銘巴蜀弟子

中憲大夫江西建昌府知府少岷曾公墓誌銘

張

佳角

武宗朝吾蜀數君子者起咸尚文章氣節而江陽少岷

曾公其一也余為童子時聽學士長老誦說公名德如
隔世人嘉靖丁巳走江陽為先府君乞墓銘於楊用修
先生始奉公几杖公亦接引後進談學術經濟灑灑有
致公歿後二十八年而公之子某考功君持狀以誌銘
請豈以余受公一日之知耶余客江陽時聞公父某以
公貴受封遂稱封公其人個儻重義數急人之難嘗拾
遺金於道必迂歸以伺亡金者授之能詩文著有乾峯
稿乾峯在合江縣去郡可二百里而遙縣西有安樂山

千巖萬壑競秀爭流中為洞為臺為峯為盤為嶺為泉
為峽為城為室即山經竒紀所不能臚列封公則樂之
遂卜居終老而少岷公舉矣公生竒穎殊凡兒稍長即
以聖賢正學自任七歲侍封公山陽茅屋見隙光曰此
何故哉其野馬丈虹耶封公異而詰之兒能對乎明透
屋山光似玉公應聲曰影浮書案氣如龍封公益竒之
十四歲補博士弟子每試輒高等郡侯為築別業於鳳
儀山以居之公益肆力於古今之學尤精書法得帖意

時威茂兵憲王某者聞公名欲召置西塾督學蘇某曰
曾生非可檄往也宜禮聘之公應聘往因登大岷青城
諸山西眺蒲氏東眺汶瀆胸中吞其八九而歎曰大岷
之外可稱配林孰與吾家安樂日相從几席間也遂易
安樂為少岷山因自號云正德丁卯舉省試第五人明
年成進士授戶部江西司主事時逆瑾為政搢紳趨者
如市公不惟無所投刺間有言觸之會瑾執不附己者
跪午門外而公幾不免尋權稅清源以廉明稱後轉員

外郎中條上大司徒以十事曰草皇莊裁冗費禁濫支
減廐馬清鹽法停鈔法明徵納禁使用蠲門稅重漕政
大司徒稱善而卒不能行其言丙子知建昌府公益修
循良以臻良二千石共理之效上劑益藩下悉民隱立
社學建書院羣弟子而考德問業盱水之上洋洋如也
郡有兩芙蓉山多淫祠妖術橫行公廉得其首付諸理
毀淫祠以祀伍大夫李盱江岳武穆郡俗遂變其他發
閩人王政胡添三詐偽正豪民梁教十九殺人罪暴妖

術連世勳父子屍伸雪良民羅增冤抑然皆非公之大者惟是寧庶人謀不軌要脅諸司莫敢不為壽以求免公自持如常會省城變起公遣健卒間道走上變又自帥兵兼程詣軍門陳擒勦七策王文成采之合兵火攻又慮九江南康業已從逆不分道擊之則楚援兵為梗文成檄公取南康斬賊首謝天一等四百八十餘級又自王家渡同廣信守周朝佐斬獲賊三百三十餘級釋脅從者八十五人寧庶人遂擒當公勤王時與母鄧恭

人永訣誓與賊不共天卒能成社稷功王文成亦叙公
勞烈而竟不錄先是寧庶人膏腴苑囿屋廬多為豪所
侵中丞鄭某者檄公一無所徇盡返之盱郡有巨室欲
齟齬麻姑山公裁以法又上叛逆疏內有省內姦邪顯
附陰附語繇此忌與怨交集咸為蜚語中公不免矣然
盱人至今尸而祝之益信天理人心未泯如此公以庚
辰垂橐歸移居江陽郡城購茅齋數楹藏書數萬卷日
坐其中手一編以著述自快中丞劉公大謨御史金公

深交薦可大用不起著有聖學會通河圖洛書解春王
正月考歷代史評論心學論樂律論數學論氣化皆發
自契悟無所勦襲其要歸於中正精實有宋儒所不能
道者歲旱課耕必里靜觀雨暘之故雩禱之節又著名
和錄不泥不鑿深於天人之際修川東志精核有體為
一方良翰為文高峻鬯達一本六經行乎意之所止而
不沾沾蹈古人語所與交者如王伯安何仲默鄭繼之
呂仲木皆當世偉人也楊用修白首成滇欲歸蜀為首

邱計乃不歸新都而卜宅江陽以就公相與賡酬甚盛然公意在經學思成一家言以詔來者其於題詠劄記則随意小赫蹠成草草畢亦隨散逸今存者皆諸子私錄特百之一二耳故名拾存篇云公貌修峻而癯骨立健爽即屋漏無惰容平生目不識權量手不持金玉耳不喜絲竹布褐蔬食常晏如也曾經池陽夜夢青衣童子入舟曰余九子神也九華則爾鄉李白所易重錫余以嘉名意良厚然不樂也子為余復故號公覺作青陽

九子歌公敦樸無華感乎山靈非偶然者與人真誠直
易無他腸具知人鑒料事多中然善惡界嚴嘗面斥人
過不少避而宗族賴以衣食婚葬者甚衆常祿外及先
世所遺者分授猶子士謀士交士傳輩家有塾課子弟
不效經生常語故江陽稱曾氏子弟優者為龍劣者亦
不失為虎矣一日病革將易箴啓手足謂諸子曰平生
無他恨第著述多未脫稿紹明余志是在爾曹言訖而
瞑公守建昌有祠居鄉為月旦所重其鄉之人與弟子


私謚公文節先生又祀於社公蒙詔而屈抑林下者幾四十餘年以考功君令甌寧時上最考循良高第請復公職取俞旨亦異數云公諱某字東石生成化庚子三月三日卒於嘉靖戊午十一月二十九日享年八十歲上世有祖諱長一自江西徙河南再徙麻城入蜀家於江陽為河西公是為蜀之始祖河西公有隱德不顯歷四傳生思虎思虎生海寬是為公父以公貴封戶部主事配員氏封安人公配鄧氏封安人加恭人繼配郭氏

張氏宋氏封太孺人毛氏生子六士弘舉嘉靖壬子鄉
試授涇川知縣士宗士林俱郡學生士登丁丑進士士
彥甲戌進士考功司主事士科舉丙子鄉試孫男某某
曾孫某某以某年月日葬於某山嗚呼此據狀而誌公
者如此余為諸生時余邑先達有都運童養之先生蓋
鄉之樸茂長者其父諱琦仕為瑞州通判正值寧庶人
變起通判公亦嘗督師擒賊以功陞四品秩都運公嘗
語余言江西討賊之役有幸而功者有功而不幸者幸

而功者難言之若功而不幸者吾鄉曾公是也都運公侍父任得於耳目者真且都運公平生寡言言必有中余聞而咨嗟久之夫公豈惟功不錄並其所固有者而奪之何以勸忠余謂公時曾述此言以質公公笑而不答嗚呼可以知公矣又為之銘曰

於戲公出而稱社稷臣者為年僅一十有三幾不免於二逆之耽耽公處而稱鄉先生者為年則三十有九庶幾乎兼太上之三不朽忌公在人公何所嗔篤公在天

公亦超然六子而高第者四未量者二天若有意以報
公志人限公以有涯公獨遊於無涯即小子能銘功德
而於公乎何加



明文海卷四百三十六

欽定四庫全書

集部

明文海卷四百三十七

詳校官起居注事臣顧宗泰

總校官庶吉士臣倉聖脉

校對官中書臣潘奕雋

謄錄監生臣聞益

欽定四庫全書

明文海卷四百三十七

餘姚黃宗義編

墓文九

文苑

河南參政王遵巖墓表

雷禮

遵巖王先生既卒，葬其壻會稽尹莊君祉，求余表其墓。思昔壬辰之年，先生官吏部郎，探文學為時推。目余方釋褐，偶以文字相知，見先生立志遠大，不翕翕以相驩。

亦未嘗悻悻以自忤意必入贊邦經建不朽業乃一蹶
二十餘年竟弗起耶先生諱慎中字道思別號遵巖泉
州晉江人也幼稟慧質讀書日誦數千言輒了悟不煩
師解年十四補弟子郡守葛公見所試舉子業竒之曰
兒異日當為天下士詎取科第已耶十七舉於鄉明年
嘉靖丙戌第進士疏乞歸娶二十赴銓授戶部主事監
兌通州舊以覈糧頽虧虛為稱職多操一切先生惻然
曰運卒疲轉輸極矣不厚加優卹徒刻削為耶取宿滑

故為留滯者懲之不輒貸一日視糧胥以汜爛告先生
曰此船漏所致非彼罪也但不宜久貯爾即給散於軍
曰此一軍所虧粟粒耳可以免賠償者幾何人於是運
卒相慶曰王大人活我其曲悉人情類此差滿調禮部
祠祭司時天子崇祀典多始創無故牘可稽大宗伯命
先生起草獨推原禮意揆時折中雅稱上旨辛卯鄉試
廷議以京朝官主各省試事勅先生主試嶺南善鑒別
越歲壬辰所取士林大欽果廷對魁天下尋轉主客員

外郎會詔取文學士充館職輔臣欲羅致先生使人喻
意先生固不往謁竟為所沮又因屬人望改吏部考功
員外郎以塞之未幾陞驗封司郎中時少宰元崖霍公
韜與輔臣有宿憾每於衆中譽先生同列附輔臣指共
擠之因先生疏論封典坐以變更成法謫判常州值江
陰缺令撫按欲擬署篆疑先生必辭先生喜得親民事
自效請檄以行延見耆老審所宜利者注指之即米鹽
事不憚煩邑有高姓者怙勢侵牟鄉民習為奸市先生

廉得其狀寘之獄併鉤摘諸不逞者並伏其辜邑用肅
然未幾陞南京戶部主事禮部員外郎尋轉山東僉事
提學校先生敦風教以身為標齊魯故事學官迓上官
類跪與臺前不以禮處廼諭之曰師必自重而後可以
教人若輕其師是輕其教也令以士禮相見校士秉至
公不徇舊案所識拔者多為時聞人踰年轉江西參議
值章聖梓宮由九江入楚下吏懼誤供給有棄職以逃
者先生徃董其事裁約以禮人不知疲繼陞河南參政

屬歲大饑天子遣戶部侍郎王公杲賑卹王公見先生發稟平糶有方活民數萬具以狀聞且薦其可大用會辛丑大計吏治輔臣故猜先生又因巡按在江西謁輔臣先祠以奠文委先生蓋其意所屬也先生固辭遂銜甚因考察諷銓部重違其意而外憚公論姑以不及擬調內批竟報罷士論共惜之先生聞報無愠色以獲侍父母為樂父方渠公捐養哀幾滅生事母左右承歡雖貴且老不弛勞事兄如其父撫二弟以家學切劘弟惟

中以所得取戊戌進士官至南京太僕寺少卿居家悄然閉戶取聖學宗旨以自鏡日以所得引誘後進易其耳目訓詁之陋隨其所扣皆虛往實歸四方聞而興起者以不及門為歉凡觀風茲土者必式於其廬或大事刊金石并秋闈錄序必借重先生以其言足垂訓云予嘗概先生素履初束髮登朝抵掌談天下事謂事無不可為為之無不如吾願視時諸著名者嶽嶽無所讓其諸著名者亦莫不前先生及發為文詞亦因性資英邁

吐藝林英華馳騁秦漢六朝上下而奇氣逸發變態百
出不可繩律後經遷謫轉徙反究實踐豁然有悟本真
渣滓盡融於是造詣益邃窮制作之妙不為綺靡語古
雅醇深動闕世教識者謂登歐曾之堂而入其室亶其
然乎嗟夫天生俊乂為世用也先生崛起閩中桀然自
見其才而不自滿足勇於求道卒底大成使假之重柄
必能以求道者立功業而不安於卑近乃為小人所詆
猜無以竟其所蘊何哉昔人謂子厚寓柳州而文思日

進是天殆假此以成其名也今先生雖坎軻於世而當其靜居穆然見天真片言緒論流布於海內者無不足以感發夫後學以求自得夫而後知俗套之不足貴謂造物者得無意乎先生生於正德己巳九月二十七日卒於嘉靖己未七月十七日享年五十一葬都溝邊山之原蓋先生所自卜也其世系見於太僕君墓誌銘茲不詳叙惟本其德行學術之大者特表於其墓可使世之人過此咸

知秉道守正如先生雖遭罹讒搆不及大用於時而
天為斯文所以起衰反弊永垂不朽者非人之力
所可幾也彼怙勢竊權赫視一世者雖能擯抑先
生而不能奪其聲名徒為世憎斥豈無感慨耶

陳石亭墓銘

顧璘

先生吾南都文人也當童穉時穎異早見雖其軀
不甚長神采朗秀眸子可照少學蘓氏之學筆勢
瀾溢氣局渾健人咸謂其類東坡先生亦自號曰

小坡至中歲再變其格詩務宗夫盛唐文則出入史漢而歸於簡古晚年益好著述惟期浸淫理與絕不以綺麗競能厥趣遠哉璘自登第後即相結為文友傾心幾四十餘年切劘契許日益膠固真如兄弟骨肉頃年先生以山西行太僕卿璘以浙江布政使各請老居山中與諸耆舊大夫修淨社甚懽丁酉璘召起為副都御史撫楚與先生別意殊怏怏戊戌秋忽以訃聞實卒於六月二十六

日璘哭之慟其子時萬等致禮部主事許子穀狀
來請為墓銘嗚呼吾與先生交期止此耶乃又不
獲執手永訣痛矣夫天道負人每如此也恨恨何
有窮哉乃志曰先生名沂姓陳氏初字宗魯後改
魯南號石亭居士本宋丞相秀國公升之之裔曰
澤以言青苗謫四明為鄞人曰瑤國朝以醫徵入
太醫院始家南都其詳載長沙公傳中長沙公諱
綱稱遲宜子即先生父初為黔陽令再擢長沙通判皆

有遺愛祀於土母金安人以成化己丑七月二日遲宜
公先夢釋氏奉明珠入室旦生公五歲能屬對八歲能
摩古人畫十歲能詩十二歲能舉業率奇拔驚動長者
總角著孔墨辯赤寶山賦諸文傳誦人口自是行誼文
學日益隆茂辛酉始舉鄉試暨丁丑始舉進士雖久處
韋布時名曄然出入人上閣老野亭劉公太宰白巖喬
公少宰柴墟儲公宦南都時皆海內具瞻鄉定山莊先
生負學行高望皆引為忘年友既仕改翰林院庶吉士

除編修與修武宗實錄推內館教書癸未禮部聘同考官甲申與編修鄒守益等及與修撰楊慎再論大禮實錄成進侍講賜白金文綺隨充經筵講官撰講章善寓諷勸上問宰臣知其名丙戌授冊封楚王踰年出為江西布政司參議先生素抱經濟樂於惠民於是備設科條以杜奸完賦同官驚服進山東左參政按沂莒滕費諸郡邑察其災荒發官帑市牛百餘頭給民墾藝且寬其稅期年皆熟又為蠲除種馬薪木運布諸征民獲甦

息嘗至鉅野察有盜將發調卒襲捕散之即言於中丞
職兵者不謂然已而盜竟破縣去衆許其畧嘗遇執政
於德勞之曰先生久外將召矣對曰齊民困甚苟行吾
疏勝吾受德意大忤吏部舉河南福建布政司皆不遷
遂改山西行太僕卿再上疏請老歸築遂初齋於家園
杜門著書絕意世事及今天不愛賢遽爾見奪蒼生已
矣又如鄉國何哉先生孝友忠信出於天性事二親死
生情文備極人所難及素廉於財長沙公歿後營弟妹

婚姻貸以備禮及貴周卹南都與四明族屬徃徃曲殫
心力嘗有大臣後流落不能歸葬必圖為之所居京凡
鄉閭人急難匍匐拯之唯恐後蓋平生舉事造念率歸
忠厚固不可以計數也所著書有皇明翰林志金陵圖
考金陵世紀畜德錄誨似錄花巖志游名山錄晤言詩
談總若干卷詩文拘虛集若干卷又金陵志山東通志
南畿總志皆出筆削狀謂其清修厚德文藻惠政合而
歸之有道仁人吾鄉稱為實錄初配楊繼馬婦德并茂

馬尤能文贈封皆淑人子男四伯時萬鄉進士仲時億
叔時兆皆才哲方向進季時尚幼孫男幾女幾其興蓋
日熾云卜己亥月日合窆於楊淑人之墓墓在岔山祖
塋兆內銘曰

文以章物唯道是則發藻於才立本於德小儒偏長下
乃剽竊於維先生秉德自天企彼四科庶幾閔顏乃述
乃作是謂善言達諸大業僅試旬宣乘雲御風言返天
門有遺在壤瘞玉彼岔赫赫其光燭於九原匹躬斯已

百代攸聞

侯二谷墓銘

茅坤

樂清侯二谷先生予嘉靖戊戌同年進士也諱一元字舜舉始釋褐時同年錢塘翁君相首篤行會稽沈君鍊任節俠永嘉王君德譚經略而先生暨華亭莫君如忠治古文及詩歌然先生尤好為湛深之思予不自量抑稍稍共五君相頡頏以為聞於時已而各以授官散去其所為離合顯晦不同而要之同歸於道者間嘗賦六

子詠是也久之翁以廣平太守致仕歸而沈以上書詆
執政徙塞上被誅王繇給事中以直諫出臬南粵且棄
官去已而海倭內訌復提兵赴族父難死之予亦以忤
當世免官而先生同莫華亭浮湛世路乍告乍起者三
十年始並領方伯然竟不及持節鉞參大政以究所為
戮力四方之志命也然予於翁之歿聞表其墓沈及王
之死復書其烈及碑賜祠而莫且屬予序其家藏刻嗟
乎先生之歿而葬也少子某抱其弟某所為狀屬予銘

其墓予安能獨無情乎哉按狀先生於南京刑部時省
因書暇輒下帷謝賓客讀六籍及六家言間與曹郎王
公問皇甫公沆蔡公汝楠許公應亨輩相與選勝休沐
分曹賦詩風流文藻於莫華亭無間焉於參議廣東提
兵大名道頗得先生文武材而轄河南轄江西也則又
稍稍聞其撫災賑饑不下古富鄭公青州之遺獨故嘗
以文詞忤江陵相公坐構去其死事雖於沈會稽王永
嘉不相及而抗直之聲則又於兩公者或相雁次矣及

按先生罷官歸而卧林廬也入以將母出以悌弟及服喪讀禮所散橐中裝以贍內外姻族鄰里鄉黨則又有翁廣平之所不能而節而書之者什且伯焉嗟乎先生於予所詠六子蓋兼之矣然考其自則繇上世節毅公畱高大父誠齋公震大父梅亭公敬及父廷訓世忠義而流耀後昆者遠矣方其年十三以父嘗議大禮坐構逮繫走數千里守闕上書悲慟天子為之霽威縉紳大夫於今聞之猶為欷歔而嚙指飲泣者其歿也猶手書

祠堂事以授少子某其於名理大誼類如此所著詩文
詞賦傳記論贊誌述共若干什晁太史璠嘗序而傳之
以行於世享年七十有五葬之三台峯之麓子男六人
曰興邦曰化邦曰儷邦曰任邦曰保邦曰傳邦化邦中
鄉試卒他並郡縣博士弟子員女一人孫男女二十餘
人中多魁壘相望而未艾者銘曰

其入朝也文學政事鏗然巖廊其解紱也角巾竹塵山
水徜徉生不為三公歿猶為文昌銘爾藏聿耿光魂則

無不之兮於海上異人乎翱翔

朱公墓志銘

唐順之

公姓朱氏諱某字某吳縣人也父東耕君謚以隱德為里中所推至公讀書為儒在縣學若干年以貢入太學在太學一年謝去歸老於家明年子鴻漸第進士歷官兵部武選主事於是天子封公武選主事後鴻漸為武選郎中已而鴻漸守瑞州調守廣信又自廣信調守梧州而公復封鴻漸未去梧而公卒於家某年月日也公

自少苦志讀書嘗寓蘇城北寶幢寺寺傍空室一區寺僧以寄棺椁其中歲久積疊牆壁間鬼氣觸人戶無履跡公喜曰此真吾讀書處矣因獨攜一童子往讀書其中每夜中或晝風雨輒有聲陰陰若嘯若泣一童子者數以為鬼也竟驚病死而公讀書其中如故公既以老儒生精於治經又性喜為詩所著有草堂集凡十卷蘇人故多以詩名家而近時則廸功郎徐君昌穀最著昌穀嘗數過公論詩公曰詩貴成家格卑弱固不可若規

規摹擬前人逼真亦詞家大忌也且夫古之為詩者以寓性情也得之於體裁而失之於性情亦安用詩昌穀深服其言故公之詩雖醞藉古人而要於自寫己意略如所以對昌穀語然昌穀之詩則自海內藝文之士莫不喜道之而公之詩雖以吳之人士雅好為詩者亦多不能舉其詞豈公善韜蓄以為既隱矣不欲以言自文耶抑古所謂山澤之士必有待而後能施乎世耶彼其所謂有待者不獨操柄也雖文詞技藝若可以自振於

世者固亦不能無待也耶公既以讀書至老無所遇而發之於其子副使君副使彊直有節概不善與時上下其為宦也亦徃徃多鯁自為郎積若干年而始出守為守歷三郡積若干年其最後徙梧梧瘴癘窮微地也副使君訢訢然曰吾所聞於家大人者如是吾何憾公亦訢訢然曰吾兒如是吾何憾公卒之三年某月日副使君始得地於陽山白塔塢之北麓乃克葬公先葬之日副使君具公行事為狀來請銘余雅善副使君其語當

不誣為之叙而銘之公娶李氏繼娶鄒氏子五人其長
副使君鴻漸也次鶴鳴虎文雉膏馬良孫男九人承家
承烈承宣承武承文餘未名曾孫四人享年七十有九
銘曰

學古為儒委蛇步趨挹其容者以為此山澤之癯馳封
自天有子則然署其墓者以為此梧州之阡

徐魯菴先生墓表

王世懋

於戲此魯菴徐先生之墓先生嘗讀書中秘為諫議大

夫不稱稱魯菴先生尚德也按狀先生姓徐氏名師曾
 字伯魯即以魯顏其菴為別號云徐氏其先嬴姓偃王
 之後散處太末至勝國時有諱潛者知龍慶州始來家
 吳江數傳至文亮以贅壻始城居文亮生達達生綱綱
 生養恬公朝出後其從父縉實為先生之父元配王孺
 人子弗育其貳凌孺人實生先生先生有異質弱不
 好弄七歲就外傳即匡坐讀書終日疑然授以易義輒
 通大略十二能詩歌屬古文詞十四試有司不得志自

是數絀而名益起吳中子弟執束脯紛來受學而先生亦抗顏為人師嘉靖庚午先生年二十四矣郡守馬公以儒士首選上御史試復被放人皆惜之先生不以數奇自沮顧益下帷誦習嘗程書自課屹屹至丙夜不休其學自易外旁逮諸經下至洪範皇極數法陰陽歷律醫卜籀篆諸家之言皆能通其說亡論經生即世稱鉅儒弗過矣歲辛丑始遇令喻公督學使者楊公兩公皆名能得士於是先生試輒被賞遂冠邑諸生而諸生亦

亡敢雁行者所遇監司直指無弗人人稱知己矣丙午
領鄉薦丁未上春官連捷念兩尊人年高而生母在淺
土遂稱疾不對制歸歸而褻凌孺人之葬已養恬公召
先生而諭之曰兒幸第春官一命行及如廢前代之典
章弗考惜於國家之令甲亡稽胡以酬上恩夫精義者
致用利用者安身兒其勉之先生奉父命乃益專志於
學亡何養恬公卒先生自傷不以祿養哀毀幾不勝終
喪事亡踰禮癸丑成進士選為庶吉士閱二載試恒居

優解館時顧不得授史職出已為兵科給事中先生無
幾微恨色夙夜奉職明年嫡母歿京邸護喪歸服闋赴
部補吏科先生在兩垣先後長官邱梁二公雅知先生
諳悉時務凡大議多從商榷即公疏多出先生手而先
生亦自有建白如酌處川兵請立任備祠之類多見施
行庚申奉命冊封周藩便道休沐閱歲歷轉左給事中
當是時肅皇帝春秋高益摧折諫官而相嵩用事陰齟
齟言者以自便臺省多循默失職先生歎曰吾奉先人


遺體不忍即狼藉闕下奈何效儕輩積月奉嘿嘿坐致
金紫乎而會奉使時脾疾作至是益甚先生曰吾有以
自解矣因請告不往闕書舍於南湖之上聚書萬卷吟
誦若諸生時已遂屢疏乞休銓部惜不為請隆慶辛未
再疏始奉俞旨致仕然天下益想聞其風今上初用兩
臺使者薦竟起為禮科左給事中檄迫之出先生喟然
曰臣在先朝以不能建明故竊附周任之義以止今羣
賢滿朝臣老且病何能復裨聖明萬一復抗疏辭上諒

其情許之於是海內愈益高先生之行御史郭中論薦甚力行且復召先生託所知言之銓部乃已先生既無意用世常思託遺經以自見故晚年論著彌富學尊望崇鄉邦方倚為著蔡而先生遽捐館舍享年厯六十有四云遠近哀賻遠同太邱鄉先生歿而社祭先生當之矣平生所著有周易演義禮記集註正蒙章句世統紀年湖上集所纂輯修註有文體明辨詠物詩編臨川文粹大明文鈔官學見聞六科士籍吳江縣志小學史斷

經略全書共數百卷行於世又以字學不明欲緝全編以贊同文之治尤邃醫術論著業已數十篇此皆有志未成者也先生於學雖無所不窺然根極歸之於敬嘗揭其齋曰主一無適旦夕諱之即燕居顰笑咸有槩矧性雖醇謹偃僂自將至取予大節毛髮不可苟堵宮蕭然有以自樂終不為人居間也吳俗好言冥福先生之葬元配併自營壙誠其二子曰吾生平不敢遂過嘗有凜凜庶幾之心即冥報當不吾譴小子誌之毋徇俗好

為也屬續之辰猶勉二子以持敬指牀頭書令收篋中而已終不及私人謂先生之學真得於敬云有丈夫子二人詢論皆能世其家其它詳具誌銘中不載余惟國家以科甲羅士士由此進者爭願出所長自快然中原之人或不知止大江以南官多六百石自免者談者謂江南人多田園子女之奉以故輕去其官云若先生當盛年美宦一旦棄去編摩窮年此亦詎有所染好耶當其請告時天下未能盡窺其指見以為明哲保身而已

載更兩朝途險者已就夷居靜者且思動而先生卒堅
卧不起然後有以見隱君子之真也昔蔡中郎為人作
墓碑獨云於郭有道無愧色余非中郎其人無足為先
生重者然先生亦詎減郭有道哉



明文海卷四百三十七